

錢海岳撰

南明史

第十冊

中華書局

錢海岳撰

南明史

第十冊
列傳
卷七十四至卷八十三

中華書局

南明史卷七十四

列傳第五十

無錫錢海岳撰

秦良玉 子婦鳳儀等 弟翼明 冉紹益 況上聞 楊光斗 子昌厚等 楊勝吉等 楊昌統 楊光同

楊通堯等 黃達 冉天澤 從子奇鏞等 冉天嗣等 田元 子需霖等 張六謙 唐鎮邦 覃進孝

覃勳麟 田永豐等 向同廷等 向霖龍等 彭象乾 子朝柱等 向暹 彭弘澍 田儒英 魯國道

楊之明 阮士奇 薛維屏 馮昌期等 安在嵩等 郭鸞昌 祁廷諫等 馬京 弟亭 李華宇 周雙橋

全俸 丁應選 王自明 楊起泰 何應辰 廖依乾等 龍在田 子韜等 祿永命 王克猷 高位

那嵩 弟崙 華子燾 朱養恩 高應鳳 吳宗秀 許名臣 袁潤 刁定邊 宋守臣 子昌謨

等 王顯甲 楊桂杏 龍建極 韋國相 隴懷玉 陸安貴 沙飛雄 龍昌 高天錫 程文俊 段朱綉

楊忠盡 蘇鑑 岑廷鐸 黃天祥 黃世勳 王萬化 韋繼宗 韋英 鄧世廣 莫貴忠等 陶斗等 楊

光謙 丁國祥等 羅大順等 任守綱 龍吉兆 龍吉佐等 楊華如等 呂洪揚等 莫之廉等 王應兆

等 阿仲等 安坤等 黃蠻長等 黃安信等 沈文崇等 薛士道等 蓋世祿 王耀祖 王先住等 齊
正等 周義等 祿昌賢等 王朔等 秦祖根等 李日芳等 祿益等 楊道生等 蟒達喇 弟蟒猛白

畢方濟 艾儒畧 潘國光 李科羅 瞿紗微 卜彌格等

秦良玉，字貞素，重慶忠州人。石砭宣慰使馬千乘妻。萬曆二十七年，征播州蠻，破婁山關，良玉夫婦功稱最。千乘以忤內臣丘乘雲下獄死，命良玉代領其職。爲人饒膽智，善騎射，料敵如神，兼通詞翰，儀度嫺雅。每行軍，號令嚴肅，秋毫無犯；有犯，親故不少貸。所部兵器用長矛，白木爲之，「白桿兵」遂著名海內。

泰昌時，奉調征清兵遼東，遂卸裙釵易冠帶，與子祥麟、婦張鳳儀、家將文指揮妻白，及左右侍婢，皆男妝雄服，衆八千人。賜良玉三品服，授兄邦屏都司僉書，弟民屏守備。天啟元年，邦屏渡渾河戰死，民屏突圍出。遼瀋連破，關外殘兵奔竄。良玉聞變，統精卒三千，與祥麟兼程守山海關。祥麟中矢，猶拔矢策馬奪勇防禦，不肯退。良玉陳邦屏死狀，尚書張鶴鳴亦言渾河血戰，實石砭、西陽二土司功，詔加良玉二品服；祥麟指揮使，贈邦屏都督僉事，蔭子，祠祭；民屏進都司僉書。命回川練兵赴授，良玉率衆回蜀。

未幾，奢崇明圍成都，陷重慶，川中大震。諸土司皆貪崇明賂，逗留，獨良玉斬使焚書，

遣邦屏子翼明、拱明，都司胡明臣，裨將秦永成先發，自與祥麟率殺手六千，令民屏提調，楊學禮督陣，前鋒沿江而上，寇不敢出。而崇明圍成都急，巡撫朱燮元調援，良玉乃繇川北鼓行而西，分遣民屏復安岳、樂至，良玉復新都，長驅抵成都。寇敗解圍去，乃還救重慶。民屏禽寇將樊虎，奪二郎關、佛圖關。時南坪關先爲翼明所扼，拱明斬寇將沈霖兩河，火舟千餘，寇束手困守城中。良玉兵抵城下，腰刀先登，手斬千級。寇張彤迎戰，祥麟斬之，乘夜復重慶。永成斬將冉應龍忠州。川東悉平，功第一，授都督同知總兵，復晉祥麟宣慰使，民屏都督同知副總兵，翼明、拱明咸加參將。良玉益感奮，以首兇未獲，即領兵進剿。分遣裨將秦衍復遵義，祥麟克永寧、蘭州，親率翼明、拱明先後攻破紅崖墩諸大巢，禽將李楫等。朝命數賚金幣，良玉疏謝，且言：「臣率翼明、拱明提兵裹糧，累奏紅崖墩諸捷，乃行間諸將，未睹賊面，攘臂誇張。及乎對壘，風聞先遁，敗於賊者惟恐人之勝，怯於賊者惟恐人之強。如總兵李維新渡河一戰，敗衄歸營，反拒臣不容一見。以六尺軀鬚眉男子，忌一巾幗婦人，亦當愧死。」優詔報之。

崇明巢破，結水西安邦彦同反，引苗衆圍貴陽。良玉命民屏及其子佐明、祚明從巡撫王三善救之，大破邦彦平越，搗大方。三善死，民屏從殉，佐明、祚明重傷脫。良玉疏聞，有「仇不共戴」語。詔贈民屏右都督，佐明、祚明授將，翼明、拱明皆晉副總兵候調。

崇禎三年，清兵陷永平四城，畿輔震動，詔天下勤王。各鎮自保觀望不前，良玉獨慷慨誓衆，率翼明捐資濟餉，師晝夜兼行抵都。都人聞白桿兵至，朝市喧傳安堵。上詔褒美，加少保，挂鎮東將軍印。召見平臺，賜蟒玉綵幣羊酒，賦詩四章旌之。會四城復，蜀有百丈關之警，命良玉歸。翼明護築大淩河，城成，亦撤兵還鎮。祥麟、鳳儀代駐近畿防守。後夫婦分兵逐王嘉胤、王自用於山西、河北。已調襄陽，鳳儀以孤軍戰歿侯家莊，祥麟乃南旋。

良玉自京師還，奉命專防川東。七年，張獻忠入川，圍太平，良玉提兵急救。會祥麟自北還軍，前後夾擊，大破之，遁去。十三年，羅汝才復入川，聞良玉兵至，反走。良玉率永祚、翼明、譚穩、秦篆，迭破之馬家寨、留家壩，斬東山虎，追至譚家坪，寇披靡逃，王光恩、惠登相降。良玉率祥麟親追至仙寺嶺，奪汝才大纛，禽渠虎塌天，前後斬八千餘級，蹂死者徧山谷，獲甲仗馬騾無算，衆喪膽不敢西。

先是，左良玉縱獻忠走合汝才。是歲七月，二人悉銳復攻川。當是時，楊嗣昌主驅寇入川，盡撤蜀精銳赴楚，邵捷春以弱卒二萬守重慶，所倚惟良玉及副總兵張令二軍。適知州陸遜之過重慶，捷春命按行其營，嘆曰：「不圖今日見細柳營，娘子軍名不虛也。」良玉爲置酒論兵，語遜之曰：「邵公不知兵，吾一婦人，受國恩應死，恨與邵公同死耳。」遜之問故，良玉曰：「督師以蜀爲壑，無智愚皆知之。邵公不以此時爭山奪險，令寇無敢即我，而坐以

設防，此敗道也。」遜之醉，誤曳其袖，良玉遽引佩刀自斷之。

十月，獻忠破觀音崖，從上流渡，良玉偕令急扼竹園坪，挫其鋒。令戰死，良玉趨救不克，所部三萬人畧盡。單騎見捷春曰：「事急矣！盡發吾溪峒卒，可得二萬，我自餽其半，官半之，猶足辦寇。」捷春見嗣昌與己左，而倉卒無見糧，謝其計不用；良玉乃太息歸。捷春師旋覆，嗣昌乃來重慶，謀邀獻忠。獻忠復出峽破襄陽，嗣昌亦死。

十六年冬，獻忠盡破楚地，將入蜀。良玉圖全蜀形勢，上之陳士奇，請益兵守十三隘，士奇不能用；復上之劉之勃，之勃許之而無兵可發。

十七年正月，獻忠攻夔州，良玉馳救，衆寡不敵潰。威宗殉國，衰經北向大哭。及清兵入蜀，良玉語其衆曰：「吾一婦人，受國恩二十年，今不幸至此，其敢以餘年事虜哉？」與所部中軍江國紀等約曰：「從虜者族無赦。」乃分兵守四境。獻忠徧召土司，無敢至石砭者。忠、鄆民襁負來依者踵接。昭宗即位，晉太保兼太子太保，封忠州侯。永曆二年，宗室容藩使至徵粟，良玉不應。容藩將攻之，乞救於李占春，容藩乃走。未幾卒。年七十五，諡忠貞。

鳳儀，沁水人。尚書銓女。祥麟，字瑞徵。有勇畧，屢立戰功。先與良玉書，言：「兒誓與城存亡，願大人勿以兒爲念。」良玉批其旁曰：「好、好，真吾兒。」卒，子萬年嗣。

翼明，官總兵，封威遠伯。十三年，與萬年、楊璟以衆同降於清。拱明，官總兵。討普名聲，力戰死。

同時，冉紹益，字添昌，石砭人。累功官荊州總兵。國亡隱卒。

況上聞，字德陞，上高人。歲貢。授石砭經歷。良玉兵悍，以威折之。良玉勤王，以監軍遷寧川參軍。

楊光斗，字北樞，邑梅洞人。世襲長官。萬曆時，卻貴州紅苗。播州楊應龍反，與石砭馬千乘、西陽冉御龍、平茶楊光祖，隸總兵馬孔英討之。播州平，論功，進散官一階。清兵侵遼，奉詔將邑梅兵援遼陽，陞都督僉事、京營參將歸。崇禎十七年，乞休。永曆三年卒，年七十三。

子昌厚，字義極。諸生。愛墳典。襲職。昭宗即位，溪洞土官均陞階，昌厚晉都督僉事同知。光斗卒後未幾卒，子勝皞襲。十三年降清。

同時楊勝吉、楊昌統、楊光同、楊通堯、黃達。

勝吉，平茶洞人。世襲長官。父昌胤，天啟中，從征奢崇明、安邦彥，論功，授都督僉事。剿河南、湖廣寇，禽斬多。貴州紅苗滋釁思、銅問，攻平茶，昌胤築太平新營，扼險自

守。勝吉從昌胤剿寇承天，以驍敢，賜「忠貞報國」旗號，授京營參將。永曆時，歷恢剿漢羌總兵，思沿都總管，挂平夷將軍印。紅苗間出剽劫，復扼太平營，苗無所掠，引還歸降。卒，子秀新襲。

昌統，字繩可，石耶洞人。世襲長官。征鎮溪苗，防淮安有功。永曆二年，錢邦芑奏擢狼山總兵，加太子少傅都督同知。卒，子勝美字如文襲，十二年降清。

光同，地坎人。世襲長官。永曆十三年降清。

通堯，邑梅洞人。世襲大田所千戶。奢崇明亂，以督運功，陞指揮僉事。崇禎十七年，大田蠻畔，率五百人討之，轉戰山峒間，重創死。從弟通靈，亦力戰從死。僕負屍力竭死。達，彭水人。都督僉事屯練總兵。

冉天澤，字沛生，酉陽人。讀書便弓馬，以恩貢授都司。張獻忠入蜀，修戰備。米壽圖薦參將，擊唐崖、大旺二司。隆武元年，酉陽官舍冉天錫謀畔誅。二年，遷都督僉事，援剿川黔副總兵，屢破寇，乞改文官。呂大器疏調監紀推官，防永、保邊徼。永曆元年，寇攻保靖，天澤大破之，一方以安。

從子奇鏢，大器疏請封定遠伯，天澤爲兵部司務。四年，楊鴻薦陞職方主事。宗室容

藩又題授奇鏹襲宣慰使，挂鎮夷將軍印；天澤監軍僉事。六年，胡際亨調監軍。後李占春、湯思忠、白士眉攻彭水，犯西邊，天澤扼守容坪，迭有戰功。十一年，官舍冉奇錕謀畔，不果。天澤尋卒。奇鏹於十二年十一月降清。

同時冉天嗣，西陽人。都司僉書。鞠龍，西陽人。以力聞，官把總，大破大旺兵。姚繼崇、周延卿，巴縣人，西陽宣慰司經歷。

又吳縣王道弘，涪州龍惕庵，盱眙何之潤，天台王伯繩、華大炎，嵩江華亭彭梧鳳、汪穎，鄞都林確，鳳陽張天植，高陽李如滂與張文政、李澹庵、李之華，皆先後避地西陽，以詩篇酬唱。

田元，字太初，容美人。世襲宣撫使。崇禎中，助餉從征中原，命子霈霖等授剿襄、鄧、房、竹，遷宣慰使，加太子太保、右都督。十二年，命率土兵七千入衛。會威宗凶問，歸。安宗立，蠟丸上書文安之及嵩滋戶部伍甲。華陽王至漣避寇至，時加存問。元工文好士，笙歌唱酬無虛日。隆武二年卒。

子霈霖，字厚生。諸生。襲。永曆中，加太子太保、左都督。命千戶覃應祥間謁行在，陳方畧。劉體仁兵至，憂憤卒。既霖，字夏雲。諸生。襲。永曆九年，爲劉體仁所襲執，以

助餉放歸，後降於清。甘霖，字特雲。諸生。襲。降清。元弟圭，字信夫。好文史詩酒。子商霖，字珠濤。諸生。

同時張六謙，字吉士，施州人。襲石寶司長官。體仁兵入，多方安定。

唐鎮邦，水滸人，世襲安撫使。有雄畧。寇亂，出征有功，安之重之。起兵數攻長陽。後納體仁逃兵，爲所害。

覃進孝，忠路人。奇勳子。世襲安撫使。從楊嗣昌軍，以援勳功，封忠義侯，加太子少保。子承國襲。

覃勳麟，散毛人。世襲宣撫使，挂鎮遠將軍印，降清。

田永豐，大旺人。世襲安撫使，降清。田獻章，東流司人，世襲長官，降清。田祿龍，臘壁人，世襲宣撫使，八年卒。子琦襲，降清。

向同廷，卯崗人。世襲宣撫使，官總兵，降清。弟明廷，同知，拒永順兵，襲。向國泰，漫水人，世襲安撫使，降清。向柱，散毛人，世襲百戶。天啟二年，征水西有功，官副總兵。子金鑾，降清。

又向霖龍，諸生。義勇守備。剿安、廬、池、太、光、固、蘄、黃、陞都指揮使。崇禎十二年，清兵入塞，勤王，加副總兵；向雲龍，遊擊；向霈龍，遊擊；牟世勳，參將；杜宗周，指

揮屯田總兵；向鼎周，指揮總兵；向汝選，遊擊，皆施州人。田弘澍，字伯霖，巴東人。降清。

彭象乾，保靖人。世襲宣慰使。負才名。萬曆二十七年，從母兄冉御龍征播，禽斬張弢、阿保等；征盧溪苗，禽張喬六。又督長官彭天元，追寇麕皮寨，禽斬張剿兒等。四十七年，清兵侵遼，與妻蓬氏，率五千人援之。四十八年，晉指揮使。至涿州，病不能行，命其子姪象周、緄、天佑將親兵出關，戰渾河，全軍覆，歸。天啟二年，陞都督僉事，轉後軍都督。崇禎末，張獻忠入蜀，拒守不下。昭宗即位，擢防剿湖北路苗總兵。永曆元年，以傳作霖請，與子朝柱出辰、嘗，待捷封伯。三年七月卒。朝柱征苗，斬靳龍、老梗、吳老、喬若、師保等。獻忠攻長沙，破嘗、武，督兵援剿，以功官左軍都督。子鼎，任錦衣指揮，降清。王進才、馬進忠至，鼎率舍把彭養銳、彭象震以藥弩手千餘拒之，二人潰。八年，高必正來攻，鼎率苗兵萬人拒之，必正中矢死。

同時向暹，桑植宣慰使，征夷陵寇。弟鼎，降清。上峒長官楊國棟調夷陵，加宣撫使銜。子九鸞襲。

彭弘澍，字海若，永順土司。永曆元年降清，拒必正、李赤心。

田儒英，五寨長官。以征紅苗功，陞思石守備。子茂玉襲。二年，被圍自刎死。
魯國道，辰州土官。七年三月，攻慈利，斬教諭梅聯甲。終事不詳。

楊之明，天全人。世爲天全六番招討使。弘光元年三月，張獻忠至雅州，知州王國仁初通李自成將馬科，繼又歸獻忠，與下川南道胡恒不睦，將執致獻忠。恒走土司高克禮家。而之明族姓與克禮世仇，互殘殺。弟之喬又欲因亂弑之明以降，遂執恒並家口數十人送獻忠殺之。指揮阮士奇與二子鼎鈺、鼎鐘討之喬死。之明與宗室奉鈿、主事鄭延爵合謀起兵。其妻洪亦能兵，以婢自成一隊，部將陳國富尤勇武。已戰飛仙關，兵敗皆死。子嘗襲。永曆十二年，清兵入天全，招討使高際泰、副招討使楊先柱降。際泰子一柱，字梅坡。以儒雅稱。都督銜。後與蘆山百戶竹兆夢降清。

士奇，成都人。初守成都，城破力戰出。

同時嵩潘土知事薛維屏。獻忠攻龍安，與王、李二土司守番寨，一門死。

嵩潘千戶馮昌期，獻忠至，城守。五年，平東南二路番亂，陞副總兵。汶川瓦寺土官曲沃太守澈底關，獻忠不得過。子翊仲，後降清。威州龍蒲諸寨於九年攻城敗歿，龍山番於十年斬嵩潘守備楊國柱。雜谷土官桑吉朋、阿日土官阿必太兵千餘人，於十一年攻瓦寺

敗。六月，吉朋降清，阿朋、阿姜濟於十六年敗歿，上下五族於十七年敗歿。疊溪、大定、堡山後住牧巴猪五族番，於康熙二十四年起兵挖子，火死。

威遠衛長官安在嵩，禽遵義亂民郭士奇。崇禎十三年，水西再反，防禦南關。十六年，赴永寧。十七年，援川北有功。

高縣哈壩土巡簡郭鸞昌，寇至，以土兵三百力拒不支，退高縣降清。土百戶金甌解富順圍，隱卒。

又陝西、四川土官先後降清者：弘光元年，則河州韓家集指揮使韓千貫、河州衛指揮同知何永吉、乜藏土百戶王國柱、莊浪參將魯希聖、連城指揮使魯弘、古城指揮使魯大誥、大營灣指揮使魯之鼎、西大通峽口指揮同知魯培作、紅山堡指揮僉事魯典、古城渠千戶魯大謨、西五渠百戶楊茂才、西六渠副百戶何進功、岷州宕昌百戶馬國棟、質卜指揮僉事胥承福、西寧寄彥才溝指揮使祁廷諫及子興周、北川指揮使陳師文、南川指揮僉事納元按、起塔指揮同知李珍品、西川指揮僉事汪陞龍、乜迭溝指揮僉事吉天錫、碾伯上川口指揮僉事李天俞、勝番指揮同知祁國屏、趙家灣指揮同知趙瑜、老鴉堡指揮同知阿世慈、米喇溝指揮僉事治鼎美、都指揮僉事甘廷建。永曆元年，則瀘州九姓長官任宗學。二年，則馬軍堡副千戶魯三奇。三年，則茂州左都督郁孟賢、小姓長官郁從文、大定沙壩千戶蘇忠、小黑水百戶

郁從學、嵩坪百戶韓騰龍、安陽地隘口長官王燿、土通判王啟睿、龍溪土知事薛兆選、阿都正長官結固。四年，則懋功阿日土司黑兒加。六年，則平夷長官毛長才、蠻夷長官文鳳鳴、沐川長官悅曉瞻、雅州大乘司徒張世祿、大國師樂雲程、泥溪長官王嗣傳、瀘衛長官任長春、瓦寺宣慰使曲翊伸、茂州長寧長官蘇廷輔、靜州土司董應詔、隴水長官何裳之、沙壩安撫蟒答兒、草坪巡簡蘇尚智、竹木坎巡簡坤兒布、牟托巡簡溫懷忠、沈邊千戶余期拔、冷邊長官阿撒札、黎州安撫馬甲。十年，則三川王家堡百戶辛偉鼎。十二年，則嵩潘阿思峒千戶桑立架、國師巴碧太。十三年，則平茶長官楊抵綱、河東長官安泰寧、威龍長官張炤遠。十五年，則麻竜里百戶趙應臣、洮州卓泥指揮僉事楊朝樑。十六年，則黎州土司馬溶、穆坪宣慰堅參喃喀、董卜韓瑚土司達結租、馬兒結等。

廷諫，西寧衛人。自成兵至，與諸生胡璉器、莊浪，土司魯胤昌、中族，番目完沖等歃血誓盟力守。璉器爲參軍，斬賀錦，已廷諫被執，子興周至西安乞師。清兵至西寧，釋廷諫，與李天俞招西寧、河西各土司，執番趙進忠降清。

馬京，黎州人。世爲安撫使。初，張獻忠入蜀，以蜀人易制；惟黎、雅間土司難於驟服，用降人招誘，鑄金印齎之。京時年十六，擲印於地，誓不屈。獻忠遊擊苗甲赴黎雅任，

京密調番衆，與弟亭攻之，禽弁目七十餘人，斬之演武場，祭旗起兵。命白通使及其子寰翠招致富莊頭人姜、黃、奈、李、蔡、包、張七姓子弟。土千戶李華宇亦率衆至，京即以七姓界之，而建昌將周雙橋、全倖，海棠堡指揮使丁應選，越嵩衛指揮同知王自明，寧越守備楊起泰，以道臣胡恒之檄，引兵入援。聞恒死，屯大渡河所，遂與京兄弟合，得兵萬餘。大戰雅州龍觀川，斬數千人，陣禽方總兵戮之，餘寇遁還，遂復黎、雅，自是不被兵者三年。京少年好酒色，踰年竟卒，亭襲爲千戶。永曆四年九月，孫可望將劉文秀至，竭力拒守，被執不屈死。華宇苦戰，被執剛死，年八十四矣。應選亦以年老歿於陣。七姓子弟頭人亦俱戰死，無一降者。

華宇，黎州人。累遷副總兵。

雙橋、倖，建昌衛人。倖遷遊擊卒。

應選，字如龍，越嵩衛人。官副總兵。

自明，彭縣人。能用衆，遷副總兵卒。妻周經殉。子乘龍領其軍。

起泰，名山人。後戰死。

同時何應辰，珙縣人。土指揮同知。侯天錫調成都，追寇鄭家山，防白水。已從楊嗣

昌太平瑪瑙山，禽張一川，授守備。中創歸。樊一衢起兵，調軍前卒。

廖依乾，名山人。世爲土千戶，掌黎州所印。和解漢夷相攻。艾能奇至，保名山，敵不敢入。王國仁降，郝孟旋來歸，曹勳、范文光以師會。依乾招集軍民，安插羅繩、名山。清兵陷名山，楊成名妻張自刎死。其後越嵩、淳山各寨番保於十三年屯冕山相嶺，未幾敗歿。

龍在田，石屏人。世爲土舍人。天啟二年，與阿迷普名聲、武定吾必奎平滇賊安效良等，繇土守備遷坐營都司。崇禎八年，應詔擊楚、豫寇有功，擢副總兵。十年三月，禽大盜郭三海，與許名臣破張獻忠鄖陽山中，斬二千餘級。十一月，破羅汝才於天井山。十一年九月，破賀一龍、李萬慶於雙溝，晉都督同知。十二年三月，破馬守應於固始，斬三千五百級。獻忠畔，熊文燦命在田駐穀城，防其東突，中讒罷歸。行至貴州，擊平畔賊安隴壁。

十五年夏，中原盜益熾，疏言：「臣捐資募精兵九千五百，戰象四，戰馬二千五，載捷二十有八，忌口中阻。自臣罷歸，親藩辱，名城陷。蓋諸將所統多烏合，遇寇即逃，乏餉即噪。滇兵萬里長驅，家人父子同志，非若他軍易潰也。一歲中，秋冬氣涼，寇得馳騁，春夏則入山養銳。夫平原戰既不勝，山蹊又莫敢搜，蕩平何日？滇卒輕走遠跳，善搜山。臣願整衆掃寇，望速給行糧。」下部議，竟不行。

隆武元年八月，必奎畔，在田與祿永命討禽之。未幾，沙定洲據雲南，迤東諸郡盡陷，